

Kalaallit Nunaanni tamat oqartussaaqataanerat kiisalu innuttaasut peqataatinneqartarnerat pillugit naammaginnittoqarnerisooq pillugu apeqquteqaat aallaavigalugu oqallittoqarnissaanut siunnersuut.

(Inuit Ataqaatigiit Inatsisartuni)

Akissuteqaat

(Naalakkersuisut Siulittaasuat)

Naalakkersuisut tamat oqartussaaqataanerat uagut atugarput pillugu apeqquteqaat aallaavigalugu oqallittoqarnissaanut siunnersuut tigulluarpaa, Inatsisartunilu oqallittoqarnissaanut qilanaarlutik.

Siullertut oqaatigalugu Naalakkersuisut erseqqissarusuppaat uagut naalakkersuinermik suliaqarnitsinni tamat oqartussaaqataanerat uagut atugarput aamma tamat oqartussaaqataanerisigut naleqartitat tamatigut illersortussaaqatsigit, soorlu kiffaanngissuseqarneq, assigiimmik naleqartinneqarneq, inuit aqutsisuunerat aamma sunniuteqaqataanissamut pisinnaatitaaffik. Taamaattoq tamat oqartussaaqataanerat naleqartitaniinnaq imaqaanngilaq. Tamat oqartussaaqataanerat aamma aqutseriaasiuvoq nunami naalakkersuinikkut aqutsisoqarnissaanik qulakkeerinnittussaq aamma innuttaasuni amerlanerussuteqartut kissaataannik isiginnittussaq kiisalu aalajangiunneqartut pisariaqartut aalajangiunneqartarnissaat - tamarmik tunngaviliunneqartunut inatsisini aalajangersarneqartunik ataqqinnilluni pisussat.

Apeqquteqaat aallaavigalugu oqallinnissamut tunniunneqartumut tunngavilersuutitut tunngatillugu tamat oqartussaaqataanerat uagut atugarput inuiaqatigiinni oqallisaalluareerluni aqutseriaatsitut nutarteriffigineqarmat piffissaq ungasippallaanngitsoq qaangiummat eqqaasitsissutigissallugu pissusissamisoorpoq. Tamanna 2009-mi Namminersorneq pillugu Inatsisip akuersissutigineratigut pivoq, tamannalu 2010-mi Inatsisartut Naalakkersuisullu sulinerat pillugu Inatsisartut inatsisaannik malitseqartoq.

Tamanna tunngavigalugu oqarluarsinnaavugut tamat oqartussaaqataanerat Kalaallit Nunaanni massakkut ilusaa ullutsinnut naleqquttuusooq, inuiaqatigiinnilu isumaqataalluarfigineqartoq.

Tamat oqartussaaqataaneranni uagut atukkatsinni anersaakkut oqaatsitigullu ataqqinninnissaq naapertorluinnarlugu Naalakkersuisut sulimmata erseqqissarusuppara. Apeqquteqaat aallaavigalugu oqallinnissamut tunngavilersuutini ataasiakkaatigut erseqqissarneqarpoq Naalakkersuisut tamat oqartussaaqataanerisigut naleqartitat tunngavigineqartullu saneqqunneqartarsimasut. Naalakkersuisut tassunga isumaqataanngillat, tamannalu arlalinnik assersuusiornikkut oqaaseqarfigissavaat.

Massakkut COCID-19-imut pisumut tunngatillugu Naalakkersuisut aallaqqaataaniilli suliniutinut innuttaasut peqqinnissaasa illersornissaannut aamma inuiaqatigiit inuunerannut sunniutaasut qaangerniarnissaannut naalakkersuinikkut sapinngisamik isumaqataasoqarnissaa anguniarsimavaat.

- Naalakkersuisut suliniutaasut pisariaqartutut isigisavut pillugit politikikkut partiit paasiniaaffigisimavaat.

- Inatsisartut sillimaniarnitsinnut isummersortinniarlugit immikkut ataatsimiinnissamut aggersarneqarsimapput.
- Maanna COVID-19-imik pisup nakkutigineqarsinnaalernerani inuiaqatigiillu ammaaffigeqqissinnaalerneranni tamanna aamma Inatsisartunut oqaluuserisassanngortipparput.
- Naalackersuisutaaq aningaasatigut ikiorsiissuteqarnissarput Inatsisartut Aningaasaqarnermut Akileraartarnermullu Ataatsimiititaliaanut akuerisassanngorlugu saqqummiussimavarput.

Tamanna Naalackersuisut isumaat malillugu tamat oqartussaaqataanerisigut pitsaasumik ingerlatsinertut takutitsineruvoq.

COVID-19-imut suliniuteqarneq upalungaarsimanissamut sillimasussanik pilersitsinikkut Naalackersuisut aqutsiffiini tamani pingaarnersiuinikkut pingaarnarpaatut isigisimavarput, taamaaliornitsinnilu ilaatigut suliniutit pisariaqartinneqartut suliniutillu utaqqisnaasut tullerijaaqqissaartariaqarsimavagut. Tamatumunnga paasinnilluartoqarsimasooq Naalackersuisut isumaqarput.

Nunat marluk akornanni suleqateqarsimaneq eqqarsaatigalugu Inatsisartut USA-p suleqatigineqarnerani peqataatinneqartuarnerat suli atuuppoq. Suliniutinut aningaasaliissutit Danmarkimi USA-p ambassadeqarfianit periuseq isumaqatigiisutaasooq avaqqullugu saqqummiunneqarsimanerat ajoraluarpoq. Tamannali Naalackersuisunut tutsinniarneqarsinnaanngilaq, nalunaarutigissavaralu tamanna ambassadeqarfimmut ersarissaatigineqarsimammat.

Tamat oqartussaaqataanerisigut aqutseriaatsitsinni Inatsisartunit amerlanerussutillit avaqqullugit aqutsisoqarsinnaanngimmat aamma akerliuffigisanut pinngitsaaliilluni isumaqataaqquisoqarsinnaanngimmat erseqqissassallugu naggasiullugu oqaatigissallugu erseqqissassavara.

Naalackersuisut Inatsisartuni naalackersuinikkut atituumik suleqatigiittoqarnissaa anguniartuassammasuk nalornisigineqassanngilaq, soorluttaaq taamatut naalackersuinermik suliaqarnitsinni inuiaqatigiit peqataatitarnissaannut annertuumik suliniuteqartuassagatta. Naak innuttaasut peqataatitarnissaannut suliniuteqarnerput pitsaanagerusinnaagaluartoq tusarniaasarnerput nammineerluta atorluarparput, inuiaqatigiinnilu suliaqarfinni tamani suliniutigisavut pillugit paasissutissiisarnerput annertusartuarparput.

Taamatut oqaaseqarlunga partiit isummersuutaat tusassallugit Naalackersuisut qilanaarput.